

四庫全書

集部

欽定四庫全書

石倉歷代詩選卷一百七十一

明 曹學佺 編

宋詩四十八

李綱

謁告迎奉親闈聞有醴泉之除不勝慶忭作詩

寄叔易季言二弟

薄官便甘旨兩載官南徐江山富佳致足以為親娛昆

弟盡在傍承顏歡有餘寧知驛書召結束趨征途旅食
寓京華夢想懷庭除宸恩賜清燕天語聞都俞蘭省幸
備員匪才慙冒居思親動歸興謁告之東吳曉出通津
門輕舸泛汴渠鶯花已爛熳榆柳正扶疎去去指茗霅
行行遠神都中途聞吉語動色觀除書天子隆孝治朝
廷優老儒犬馬志欲養獲此伸區區

奉酬胡明俊博士見寄

載筆螭坳侍九天謫來山澤作臞仙鳴岡敢並咭咭鳳

感氣聊同嘒嘒蟬引義每慙爰叔直著鞭常恐祖生先
庭闈一去三千里自嘆飄零曷日還

同叔易季言遊虎邱寺邂逅何得之

理權適閩粵虎邱聊艤航霜林正搖落翠栢森成行入
門躡磴道喬木間疎篁秦帝試劒石破瓜分路傍生公
雨花臺說法今不亡蒼蘚衣峭壁枯荷響廻塘遂遊劒
池上毛髮森以張沈沈下無底疑有虬龍藏鐫削露天
巧胚胎勞混茫清竒儼圖畫秘怪叵測量薜荔疊秀色

枇杷吐幽香行行造梵宇金碧相熒煌危脊聳古殿長
腰曼脩廊憑虛架雲閣鑿險通禪房開軒俯吳會蜂窠
繚池隍列岫靄遙碧平湖湛孤光追尋殊未倦策杖登
崇岡幽獨詩句苦闔廬邱塚荒五聖瞻象設羽泉酌甘
芳西庵何閒寂脩竹自蒼蒼脫履足生繭解衣汗似漿
却携二三子置酒白雲堂念舊已淒惻感時增慨慷况
我方遠涉狷介懷剛腸一杯且相屬世事都茫茫冠冕
志已冷山林興偏長逝將脫羈束超然傲羲皇斯遊信

清絕去去何時忘

松江第四橋

松江第四橋風雨不可過下有百尺蛟蜿蜒枕橋卧窟宅據要津口腹長飢餓每憑波濤勢能作舟楫禍安得飲飛手坐使神姦破往來永無虞時鼓清江柁

覺度寺

夕發富春渚朝次桐君廬桐君採藥地今作僧家居石磴上窈窕林彷彿下扶疎山根二江合清波見遊魚霜晴

響鐘磬日落歸樵漁客從何方來弭擢聊踟躕清景難
久駐悵然還問途

志宏得碧字以詩來次其韻

明月照清溪影落千尋碧輕風皺微瀾蕩漾搖金色相
携理桂楫及此萬籟寂天空露氣寒棲鳥正縮瑟何人
起秋思數弄月中笛坐使遷客情悽然感去國清遊得
英俊勝賞飽泉石豈殊在吾家親戚歎于側賦詩各言
懷險韻對勅敵歸家氣未衰開匣看三尺

遊栖雲寺

清曉戒徒御出郊為勝遊
霜林半搖落肅穆天地秋
散策陟峻嶺憑高瞰清流
禪居得蘭若迥覺林泉幽
露草淒更碧風松鬱相繆
山空鐘磬響地勝池臺幽
竹色森不改桂香泱泱浮
經行豈蓮社景物如虎邱
流水人寂寂歸雲晚悠悠
惜哉光景促妙賞難淹留
却步出山徑猶迴戀山眸
登臨興未盡更理溪中舟

華容西二十里許有墨山即離騷所謂元石也

山有大雲寺寺有雲母泉甘芳潔清大旱不
竭唐李華有詩序之甚詳其末云華貶杭州
司功恩復左補闕次于岳陽江山延望思與
高賢共飲雲母之泉躬耕墨山之下敢違朝
命無閒私欲秋風露寒洞庭微波一聞猿聲
不覺涕下况支離多病年甫始衰願餌藥扶
壽以究無生之學事垂志負火爇余心三復
其言而悲之因次其韻

霜風振枯林肅肅有異聲我登元石山適此氛祲清散
策步山巔僧廬窈而精石磴盡雲母晶瑩燦瑤英涓涓
幽谷泉玉色淒芳馨飲者得難老沈疴體皆平乃知泉
源美本自山川靈沈吟遐叔詩此豈浪得名肺腑久塵
埃於焉吸清泠玉池艷生葩漱濯歸黃庭却思陸子泉
厥味可弟兄白首困飄泊丹心竟何成鼓枻渡瀟湘曳
裾拂荆衡回頭故山遠愴恍若為情區區金石堅正賴
日月明卷舒隨用舍未覺殊虧盈風高洞庭波雲暝蘭

芷城餌藥扶始衰
究心學無生庶幾
甫知命寸田不廢
耕

檳榔

疎林滄海上結寔已纍纍
煙濕蘋虬卵風搖翠羽旗
飛翔金鸞驚掩映籜龍兒
溲落哈椰子勻圓訝荔枝
當茶銷瘴速如酒醉人遲
萋葉偏相稱羸灰亦漫為
午餐顏愧渥頻嚼齒愁疲
飲啄隨風土端憂化島夷

寓瓊山遠華館一夕夢遊
山間小堂松竹環合

有道士坐堂上誦李太白送人遊桃源序中
有良田名池竹果森然三十六洞別為一天
之語覺而異之今假道容惠當遊勾漏都嶠
白石羅浮皆洞天也豈神者先告將有所遇
耶賦詩以紀之

神清遂仙遊境寂恣遐躅羽人入我夢軒戶靄松竹高
吟謫仙文逸韻響金玉覺來殘燈熒微恍猶在目歸途
歷容惠問津非素卜將遊四洞天就彼白雲宿豈無萬

稚川妙論資灌沃試求龍虎丹一使鬢毛綠斯言儻可
信長揖謝浮俗却笑昌黎翁強項寧詰曲

宿都嶠山靈景寺

清晨遊栖真薄暮宿靈景山空松桂香雲細泉石冷高
崖敞飛簷象緯逼參井惜無娟娟月散此林下影夜闌
風露寒巖曲燈火耿疎鐘響嵌竇客枕發深省

自晉康順流六十里有山巉然臨江下有巖洞
可容千人軒豁平坦景物幽邃石罅間滴泉

厥味甘冽因目之曰玉乳巖詩以紀其事

鼓柁下端溪停橈登截薛呀然巖洞開儼若棟宇設千
夫可環揖放步靡凹凸瓏玲四壁間一一幢旆列誰令
胚渾初凝結有罅缺當年補天手不顧山石裂鑄鏡餘
舊痕瑣碎委環玦五峰近龍淵無乃通貝闕試求玉函
書何異探禹穴涓涓乳泉滴璨璨冰玉潔清聲落嵌竇
自中琴筑節嘗之味甘芳滌我肺腑熱瓊漿笑裴航石
髓謝王烈嶠南瘴癘鄉有此雲腴冽青葱松桂陰景物

助幽絕豈無會心人來遊此旌別題詩製佳名聊以紀
歲月碧落遙相望千里未磨滅

先公太師尉秀州華亭日與僧靈照師相善嘗
下村視滯夢照師曰本欲渡南海與公有緣
故來託化是夕衛國太夫人亦夢有僧開帳
而寤既歸相與語異之遣人候靈照則以見
夢之夕入滅矣已而余生人皆以為靈照後
身也故云

榜舟沂迴溪夏潦適川漲驚湍激怒瀾恠石立異狀篙
師巧為計巨絙施石上譟呼集衆力進寸退尋丈崢嶸
三數峰竟日不離望乃知勢不便智力未足伐我行極
江海幸免魚腹墓書生妙言辭過謂神所相及茲困溝
瀆更覺水石壯醜思泛滄溟千里纔一餉豈惟小中州
端欲選崑閬斯遊不可忘臨風默惆悵

自河源行如循梅雨霽天氣頗佳偶成古風

宿雨乍開霽新暘倏飛升嶠南瘴毒地乃爾氣候清東

裝遵陸途夾道松林青我家大江南及此歸有程山禽
亦為喜林間嘯新聲況復抵衡宇童稚歡相迎入室酒
盈樽聊以慰平生已矣勿復道晚節師淵明

通衢驛夜坐有感

永夜發孤嘯起看河漢流羣山湧翠浪纖月掛瓊鉤豈
謂艱難日翻成汗漫遊虛舟今不繫暮景付滄洲

其二

酷暑事行役瘴雲天一方曉登丞相府夜宿翰林堂月

落星河耿軒開風露香微涼生枕簟歸夢到江鄉

公自注云地有丞相嶺因常袞謫潮州刺史道此
得名翰林堂見圖經羅姓失其名亦唐人也

自梅趣汀行小路境堦危甚六月十一日宿金

沙寺

觸熱過梅川境磬鳥道邊林深晴有霧土曠晝稀煙略
約橫溪小籃輿礙石偏亂蟬鳴翳薈疊澗瀉潺湲閩嶺
雖近止江鄉猶渺然何曾愁瘴癘祇是怯危顛借問勞

行役何如穩晏眠遭時正艱棘賦分自迴遭已幸生還
里寧辭險著鞭夜涼棲野寺相對月嬋娟

題棲真館三十六韻

武夷古洞天奇峰三十六一溪貫羣山清淺縈九曲溪
邊列巖岫倒影浸寒綠翩如鸞鳳翔矯若虬龍蹙樓觀
聳岩堯屏幃互重複蛻仙骨遺金遊女肌削玉雞棲層
巖巔船挿斷崖腹學館存几案仙機餘杼軸藍光瑩澄
潭虹影掛飛瀑翠竹蔭天池蒼苔封石屋繪禽頂長丹

遺跡指如掬我我天柱峯幔亭連翠麓傳聞武夷君嘗
此會仙俗飛橋幾十丈絕頂亘山足障以翠雲幙藉以
紫霞褥瑤樽傾沆瀣玉豆脯麟鹿仙妃奏賓雲金鼓間
絲竹酒酣歌夕暉嘆息光景促曾孫誰復在往事空遺
躅至今風月夜笙簫響虛谷地靈饒泉石山潤秀草木
坐使七閩人蔭此仙靈福嗟余真散材性愛山水酷仙
經與地志名字久已熟薄宦方區區仙賞宜碌碌神遊
先夢寐幽覲寄圖錄寧知因謫宦乃得厭所欲沿沂窮

幽深應接勞耳目開襟豁懷抱壯觀慰幽獨却邀白雲
歸伴此巖下宿夜寒夢魂清曉發輕裝速仙遊須再來
何當謝羈束

宿開平寺去劔浦二十里有泉石之勝曩與郡
守謝德夫同遊今一紀矣溪山草木依然住
持猶舊人也感嘆有作

舊遊渾似夢佳處每難忘地僻溪山秀春深草木香世
途方梗棘老景自淒涼衲子那知此間中氣味長

自劒浦乘舟至水口溪流方漲備見湍激奔猛
之狀賦詩以紀其事

避地適南土捨車登葉舟春溪渾帶雨霽石出如牛詰
曲知操妙飄騰覺去適煙籠嵐翠滴灘激浪花浮廉利
森排戟盤回巧轉輞輕生真可戒快意且銷憂濫瀕過
三峽蓬壺訪十洲平生志江海暮景侶巢由易象觀嘉
遜騷經賦遠遊扁舟入吾手此外更何求

題留天寧明極堂

久客若飛蓬年年氣味同
猶欣容榻地更得化人宮
鬱勃炎蒸極巍峩棟宇雄
疎林碎搖月虛館迥含風
萬戶軒楹外三山指顧中
靈潮自朝夕大舶各西東
悵望關河遠蒼茫雲海空
餘生寄閒曠任運學龐翁

季夏之初自安國遷南臺天寧寺依南山而面
北暑氣尤盛暇日望山頂松林鬱然意必有
異因穴垣鑿磴以造其上形勢坦平風日清
美四顧山巒環合江潮往來景物不可模狀

月出林表清光更多夜久聞寥殆非塵世作
古詩二十韻以紀其事奉呈巽達元仲

旅泊不求安小憇南臺宮軒楹盡北鄉盛暑墮甑中開
垣追微涼山頂羅千松煩襟忽破散濯此萬里風羣山
遞環遶雲物增竒峰江潮信有期來去初不窮嘯咏得
所托幽禽亦玲瓏青霞蔽落日皎月生於東清光入疎
林照我鬢髮鬆壯年幾何時倏忽成衰翁願餐日月華
為駐冰雪容二子皆靜者翛然此相從靈丹論秘訣妙

理談真空猶恨邇城市時來車馬蹤逝將選幽僻誅茅
寄蒙籠灌溉荔枝園可敵萬戶封屋前修竹合屋後溪
流通風月應更好清歡永相同稚川晚聞道尚冀刀圭
功

過淵明故居

捨擢湓浦城稅駕柴桑里緬懷靖節翁衡宇茲避世乞
食雖甚貧折腰肯為米陶然傲羲皇獨得醉中意三徑
不願餘五柳聊自詠優游晉宋間俯仰無可愧若人骨

已朽凜凜有生氣斜川尚環流層城亦秀峙何如高世
士廟貌已頽圯誰持一觴酒薦此菊與杞時詠歸來辭
感歎成坐起

去歲道巴陵登岳陽樓以望洞庭真天下之壯
觀也因誦孟浩然氣蒸雲夢澤波撼岳陽城
之句追古今絕唱用以為韻

重湖望不極秋色藹殘陽洲渚雲沙白菰蒲霜葉黃飛
帆適沅澧迴雁過瀟湘楚客經行處依然蘭芷香

容南道中

路入容南境風煙自一方山空雲冉冉春動水茫茫紫
府丹砂秘幽村碧樹芳蕭然有佳致作箇是炎荒

錢申伯自海陵避地臨汀聞余北歸相迂于武
平賦詩見意

海嶠經行徧還為閩嶺遊清泉滌餘瘴小雨報新秋多
謝故人意來銷羈客愁慙慙問淮楚兵革已寧不

其二

我脫鯨波險君懷寇盜驚
睽離四寒暑會遇兩蓬萍
訪舊半為鬼問津多阻兵
衣冠漂蕩極風雨自雞鳴

雜興

邑犬驚行客林鳥啼曉霜
山林雲冉冉澤國水茫茫
移櫂輕舟穩釣簾野興長
誰知因謫宦得到水雲鄉

其二

暮天來遠色行客尚貪行
櫂急浪花碎月高雲縷輕
巢禽棲更起漁火暗還明
獨寢不成夢夜寒聞雁聲

田家

柴門臨小浦竹逕遶幽庄
雨翦葵蕖滑夜春杭稻香
年豐飽妻子日夕下牛羊
誰識田家樂拂衣歸興長

小雨

小雨晚初急暝雲深不收
霏霏暗煙舍索索響蓬舟
山色增遠翠漁叢生暮愁
淒涼蘇季子寒覓敝貂裘

將次錢塘

歲晚飄零日舟行杳靄間
江鄉多霧雨風物近湖山
獨

鶴徊翔久飛雲自在閒遠遊殊未已蕭颯鬢毛斑

渡浙江

理櫂適桐江隨潮過漁浦山寒雪猶積江迥月初吐御
氣凌煙霄乘槎渡星渚空濛老龍吟髣髴翠蛟舞境清
人自愁夜靜氣尤古獨坐不成眠霜晴聽津鼓

玉山道中

行李遠潑水禪扉依玉山煙嵐數峰秀雲水一溪灣小
市晚猶合疎鐘寒自還舊遊知昨日屈指十年間

寒食

余謫沙陽地僻家遠遇寒食如不知蓋閩人亦不甚重其節也感而賦詩

往歲遇寒食親賓相歡娛飄零客異土對之渾若無豈不念佳節寸心愁欲枯花間有好鳥勸我提葫蘆一醉聊自適來夢歸東吳

秋蟲

白露降百草候蟲寒自吟不知抱何恨唧唧無停音歛

爾驚客夢悽然感離心羈臣腸欲斷豈事雍門琴

是夜復乘泛碧齋至北溪口觀新橋與興宗志
宏分得泛字

秋高氣倍清夜靜舟初泛露華浩如洗月色寒可鑒林
巒與邑屋左右入軒檻晶熒星影搖嵩峯山光蘸風微
煙冪冪溪遠波湛湛端疑客乘槎坐使雲河犯觀梁且
停撓戀月愁繫纜景幽費模寫思妙造古淡吾方久于
此勝賞豈云暫願同二三子險韻時得探

賦叢菊數日來頗有開意戲題

愛菊如淵明憑欄惜花宴朝來有開意嫩藥肥欲綻願
承玉露溥一吐金英粲臨風嗅馨香為爾發三嘆

謝德夫約遊開平寺

出郭山村僻尋真殿閣幽雙溪餘賞興五馬故來遊鐘
梵含古思林泉銷客愁歸歟碧雲合羅綺溢蘭舟

宿黃藤驛

時聞浙東
方冠大作

古驛號黃藤休鞍夜已燈溪寒水清淺山瘦石稜層豪

客路方阻歲寒陰始凝開懷惟仗酒獨酌醉曹騰

銅陵阻風

春色到江渚梅花正斷魂風波留遠櫂煙雨濕寒村雁
過傳遺響潮來沒舊痕淒涼一樽酒愁絕與誰論

簡寂觀

陸修靜
故居

高士不可見雲鄉空舊居煙嵐飛瀑外露石禮星餘松
老未歸鶴沼深時見魚何人覓丹訣應有枕中書

余來湖外家問不通者累月因和淵明停雲篇

以遣懷

上天停雲以陰以雨我之懷矣川路修阻田園將蕪
幼稚誰撫雁信來遲鶴立以佇淒淒其風零雨其濛
自去梁谿爰止西江一室蕭然卧于北窓塊獨處此
人誰我從豈無軒裳誰適為榮人之生世亦以有情
亂離瘼矣棄家遐征知我如此不如無生今夕何夕
鵲遶庭柯栽植其尾迭相鳴和發書占之遠問為多
兆而未至我懷若何

桐江行贈江致一少府

放浪江湖乃吾樂，羈束軒冕非所榮。
謫官去為劔浦吏，鼓枻遂作桐江行。
艤舟浙岸候潮至，百越微茫煙水外。
波橫天際海倒流，噴雪驚雷聲震地。
須臾風軟潮已平，片帆去逐飛鴻輕。
樞謳四起日西落，暮天杳杳惟參橫。
江山蒼蒼負殘雪，江水茫茫浸寒月。
誰云逐客苦淒涼，今我斯遊最奇絕。
清晨弭櫂桐君廬，溪光山色世所無。
故人見我一笑粲，殺雞為黍聊相娛。
嗟余仕宦等遊戲，

斷梗飄蓬本無蒂但令景物供吟哦出處窮通何足計
此行幽討殊未闌滿目疊疊皆雲山鷺飛魚躍石齒齒
今夜且宿嚴陵灘

湖陰曲和溫庭筠

繡鞍玉勒黃金鞭躍馬直入無王前繞營三匝人不識
天風翻動旌旗鮮賊臣晝寢蒼黃起夢裏陽烏光照水
追風鐵騎去非遲真主那從賊中死寶鞭傳玩日淒淒
行遠不聞天馬嘶千金安用試虎口將帥何人思鼓鼙

西南火星寒有鉞畫衣繡袞垂平章九重宮殿鎖春色
豈知萬里秦城長

垓下

讀項羽傳垓下事三復而悲之因作歌以附

樂府

鴻溝已畫天下分漢王未肯空迴軍諸侯大會壁垓下
戈甲耀日如屯雲夜聞四面楚歌起天命人心知去已
拔山蓋世霸圖空却嘆當時雕不逝帳中美人自姓虞

悲歌起飲聊踟躕數行泣下竟長別倉皇不得同馳驅
明眸皓齒為黃土草木含愁照今古依然聽曲自低昂
豈憶平生離咽苦

奉酬陳之元教授見贈次韻

謫官因得窮林泉陶寫聊復資詩篇青岑疊疊山滿眼
碧波湛湛溪涵天南連海嶠饒霧雨北望吳越淒風煙
感懷觸目還得句但可娛戲那敢傳譬猶候蟲與時鳥
自鳴自己真偶然豈知飄落廣文耳飾以妙語煩雕鐫

與公平生未相識一見傾心誰與易沙陽百里阻遊從
注目寒空暮雲碧竭來邂逅慰所思况得新詩飛霹靂
我今歸去隱梁谿遠跡江湖養愚直看公白日上青霄
九萬扶搖不勞力

題伯時明皇蜀道圖

君不見開元天寶同一主治亂相翻如手舉擎盈欲惡
雖一人變易安危原近輔姚宋已死九齡黜誰使楊釗
繼林甫宮中太真專寵私塞外番酋成跋扈禍胎養就

不自知漫向華清遺七筇漁陽突騎破潼關百二山河
震金鼓翠華杳杳幸西南赤縣紛紛集胡虜傷心坡下
失紅顏墮淚鈴中聞夜雨山青江碧蜀道難棧閣連空
儂相拄旌旗慘淡雲物愁林木陰森猿鳥侶戎裝宮女
亦善騎皓齒明眸如笑語老髯奚官驅蹇驢負橐齎糧
豈供御九重徼衛復誰勤萬里艱危真自取至尊狼狽
尚爾為歎息蒼生困豺虎千秋萬歲不勝悲玉輦金輿
盡黃土空令畫手思入神一寫丹青戒今古

煨芋

今夕何夕夜未央天寒擁爐更漏長縮肩環坐有飢色
呼童取芋灰為塘蹲鴟得火良易熟脫落皮毛如紫玉
迭煨迭進爭相先笑語頗喧知寔腹錦里先生亦不貧
家園收拾動千斤凶年自可活妻子美好不減岷江濱
鄴侯昔遊衡嶽左懶瓚食餘貽半個我今歸去隱家山
豈復從人覓殘顆臞儒奉養亦已微一飽便吟煨芋詩
君不見齊公夜半意不嫌易牙和調五味而進之

九月五日對菊小飲簡申伯叔易

淵明愛此九日名對菊無錢可留客杜陵爛醉作生涯
青蘂空嗟未堪摘我今鼓柁適長淮坐見幽叢爛熳開
自從多病久不飲又爾一洗黃金壘東南節物誠已早
翠葉金花為誰好三徑荒蕪爾尚存未覺出山同小草
世間萬事皆可忘且須泛此酬秋光平生最愛老坡語
菊花開日即重陽

小飲即事呈申伯

夜涼同咏古人詩
新月娟娟照酒卮
一醉且忻軍寇退
扁舟似與菊花期
銜杯樂聖真吾事
泛宅浮家漫爾為
歸去雲山最深處
隔江千里幸相思

九月八日渡淮

長淮渺渺煙蒼蒼
扁舟初脫隋渠黃
平生見此為開眼
况復乞身還故鄉
嗟余涉世誠已拙
徑步不虞機穽設
空餘方寸炳如丹
北望此時心欲折
楚天清曉作輕寒
黃蘆著霜聲正乾
川迴金碧隱窰堵
風遠鐘磬聞龜山

艣聲嘔軋歸何處笑指江臯尋舊路松菊荒蕪欲自鉏
盜賊顛飜非所懼蟹螯菊蘂風味道且須為盡黃金舟
世間種種如夢電此物能消萬古愁

彭蠡

神禹治水江為最邈迤逶蛇鍾作滙泓澄不獨陽鳥居
浩蕩端使羣川會羣川已會江不湍朝宗到海東南安
煙收雲歛望不盡眼界始知天宇寬世傳揚瀾并左蠡
無風白浪如山起我今謫宦此中行何事恬然風浪止

陽侯也自可憐生不學世人皆世情好風已借一帆便
霽色更增雙眼明晚來畫舸鳴六舫超忽千山如脫兔
波心突兀見星宮雲際崢嶸望廬阜世間此景良不多
洞庭三峽真么麼共浮大白期一醉對此不飲當如何
嶠南僧罕遵戒律况向上事獨琮師隱居湖巖
絕不至城市超然拔俗聞余來策杖見過與
語可人知為飽參衲子也詢其所見蓋嘗從
長蘆了遊了居長蘆聚徒至千五百衆道價

籍甚江淮間余雖不之識然聲氣相合心期
自親嘗辱貽問今見琮益知了之門風孤峻
真楷老兒孫也退處天台琮將浮海訪之因
賦詩贈琮且簡了公異時得歸決須相隨于
石橋側可以握手一笑梁谿居士云

萬里謫官來海嶠眼中衲子見絕少方袍圓頂動成羣
與俗不同祇其表琮師乃是雷陽人徧歷叢林參學飽
歸來卜築瘴海濱十里湖光巖洞小深居不復踏城市

宴坐惟知侶猿鳥，惠然過我意良勤。
野鶴孤雲自輕矯，風姿已捨蔬筍氣。
語論更將藤葛繞，黃茅深處見松筠。
使我困箱欲傾倒，為親聊復戀幽棲。
訪舊終須乘漭渺，煩師飛錫過天台。
為問了公何事了。

次地角場以瘡瘍不果謁伏波廟俾宗之攝祭
期以二十五日渡海一卜即吉夜半乘潮解
桴星月燦然風便波平詰旦已達瓊管東坡
謂斯遊奇絕冠平生非虛語也作詩紀之

威信昭然漢兩公
舊于青史揖英風
戈船下瀨勲猷壯
馬革裹尸心膽雄
顧我迂疎成遠謫
惟神正直鑒孤忠
病軀阻造祠庭下
幽顯雖殊此意同

次瓊管後三日忽奉德音恩許自便感涕之餘
賦詩見志

此身飄墮到滄溟
誰謂君王念賈生
黃紙再蒙題姓字
丹書特為削刑名
山林老去何其幸
萍梗追思却自驚
天地恩寬難報德
試從今日數歸程

南遷道鬱林郡守王君示古律詩一編北歸輒
成以答其意

山圍古郡碧周遭陸績衣冠雅自褒海上來歸懷麈尾
鬢間空嘆長霜毛易書顧我耽成癖詩筆憐君老更豪
此去龍城猶不遠寧須巨石壓雲濤

晚泊蒼梧有感

常誦蒼梧雲起愁那知理櫂此間遊火山冰井舊傳有
桂水藤江相合流念遠心如嘶北馬踰年行徧嶠南州

重華一去不復返
悵望九疑空白頭

六如亭

松林葬玉近禪扃
便把伽陀當勒銘
居士已亡三昧火
侍人空有六如亭
玉環約指無消息
巫峽行雲更杳冥
萬法本來皆夢幻
春風幾度草青青

遊麻姑山

魯公辭翰勒山巔
巖峭風姿亦喜仙
假道來遊非偶爾
追尋遺跡更茫然
野花幽草堪成夢
老鶴喬松不計年

誰謂瑤臺無路到月明風露正涓涓

三月二十五日邀吳瞻民鄭夢錫李似表陳巽
達周元仲遊玄沙鳳池作

招提環擁碧崔嵬携客登臨始此回寺比道林多掩抱
峰如靈隱解飛來煙霞深處鐘聲響杉桂香中殿影開
莫道釣魚人已寂至今說法尚如雷

秋日奉陪王豐甫許子大康平仲遊玄沙宿鳳
池登昇山偶成

飛來聳秀一峰孤
鳳沼幽深若畫圖
釣艇謝亡難復契
彈琴韻在且相娛
心閒自與親泉石
車穩何妨載酒壺
萬壑千巖爭競處
不須惆悵憶東吳

次韻王豐甫同遊西禪斗車堂

傑閣雄樓杳靄間
佳辰良夜共躋攀
斗回高柄臨華棟
月湧清光出遠山
急景行將悲晚晚
此身難得到寬閒
世間百慮何時了
且對金樽一解顏

吳江

重過松江憶舊遊依然風景照行舟危橋跨水虹垂影
高閣憑虛蜃吐樓渺渺衝煙歸釣艇輕輕點浪舞沙鷗
暮天橫笛江村起激烈能令逐客愁

雜興

日出霜晴鳥雀呼東裝還復戒征途黃牛傍岸將孤犢
花鴨浮溪引衆雛橋斷水寒尋野艇路迷山曲問田夫
遠遊看盡溪山景待向龍津畫作圖

短歌

周家柱史本吾祖唐室謫仙尤所許垂世空餘道德經
傲時且以詩酒名我今去作龍津客學道吟詩真自適
也勝騎馬聽朝雞晴厭塵埃雨厭泥

幔亭峰

燕罷虹橋絕世氛曾孫誰見武夷君更無裊幕空中舉
時有笙竽靜處聞猿鳥夜啼千嶂月松篁寒鎖一溪雲
洞天杳杳知何處翠石蒼崖日欲曛

清明日

憶昔叨塵寓帝京春光淡蕩值清明
賜來新火傳紅蠟煮就香糜和白飴
遊女踏青尋苑草街童引線起風箏
沙陽寂寞都無此卧看山雲聽水聲

志宏供芍藥且以詩來再賦前韻

誰道心閒緣地僻夢裏何嘗有空色
小窓一枕覺來時燕語鶯啼聲寂寂
忽思春盡芍藥開短篇纔去花已折
嫣然數朶玉樓春何似江南稱落墨

泛碧齋詩

并序

閩谿類多湍瀨小舟詰屈行亂石間稍大則膠獨
沙陽不然谿平緩無灘聲者幾十餘里縣故有舫
焚于雷火因不復置迨今八年清流如席可泛可濯
坐視莫為非闕典耶余謫官來此暇日為邑中同僚
道其故不旬月而舫具華麗宏壯有浙舸之風名之
曰泛碧齋相與置酒以落成移舟中流沿汭輕駛四
顧溪山邑屋之美欣然忘歸而去國流落之感得暫
釋焉因賦詩四韻以紀其實序而刻之使後人知是舟

之設自吾徒始尚勿毀云時宣和二年孟夏武陽

李綱序

畫齋初泛碧谿潯十里津平疊翠岑拍岸煙波梅雨細
連天芳草嶺雲深愧煩斷取西湖景暫慰傾思北闕心
好是清宵山吐月水光天影共沈沈

自西津乘泛碧齋歸邑小雨

亂山深處翠光浮山寺歸來泛彩舟十里峰巒凝翠靄
一溪煙雨灑清秋漁燈照水明還暗野桂飄香散不收

只向畫中求好景不知身在畫中遊

題紫巖驛

稚年曾向此途行半世重來若泛萍山徑車聲欣路坦
江村市合厭魚腥連天霜草蕭蕭白蟠嶺雲松鬱鬱青
久旅懷家歸尚遠暮煙殘照宿郵亭

寄池陽黃季岑士曹

稚年嬉戲曾遊地往歲飄零假道還溪水寒生江祖石
洞雲深接九華山錦苔綠字幾多在石燕白鷗相與閒

幕府詩人富家學應留秀句滿巖間

自蒲圻臨湘趨岳陽道中作

鄂渚何曾一日安
澧陽猶喜遠江干
帝妃降矣空遺珮
公子思兮欲採蘭
水帶瀟湘宜有雁
疆連嶺蜀苦無寒
迂踈自笑謀身拙
却荷朝廷德意寬

其二

翛然多難偶存身
又到蒼茫楚澤濱
鼓舞魚龍張樂地
佩紉蘭茝獨醒人
涉江哀郢空回首
極目傷心欲向春

鼓枻蚺緣傍枯葦故應漁父尚垂綸

渡江

桂枻蘭旌楚澤東碧空如水水如空江湖落日浮秋橘
島嶼殘霞拂斷虹世事茫然煙靄裏客愁都在艣聲中
沙頭鳬雁相儔侶笑我年年逐轉蓬

桂林道中

桂林山水久聞風身世茫然墮此中日暮碧雲濃作朶
春深稚笋翠成叢仙家多住空明洞客夢來遊羣玉峰

雁蕩武夷何足道千巖元是小玲瓏

次貴州 今貴縣也在粵西潯州府屬

青楓夾道鷓鴣啼古郡荒涼接島夷陸績故城依石巘
葛洪遺竈俯江湄光風冉冉吹香草煙雨濛濛濕荔枝
欲作終焉卜居計自應僂句不吾欺

次雷州

粵東圖上看雷州萬里孤城據海陬萍跡飄流遽如許
騷辭擬賦畔牢愁滄溟浩蕩煙雲曉鼓角淒悲風露秋

莫笑炎荒地遐僻萬安更在海南頭

荔枝

玉人纖指擘輕紅猶憶恩頒自漢宮
翠籠藤盤異當日蠻煙瘴雨正濛濛

其二

百馬崩騰耆舊悲只今戈戟暗江湄
自知踈拙蒙恩重猶得南來食荔枝

即事

賓江兩岸木綿飛，負郭家家熟荔枝。
瘴雨蠻煙已蕭瑟，可堪梅子欲黃時。

其二

森森榕木碧參天，夏日初聞第一蟬。
羨蔭羨君誠得計，何須悽怨嘒風前。

所寓天寧方丈後有閣，提花數株，連月盛開。
玉雪可愛，悵然有懷，成三絕句寄吳元中。

未渡鯨波寇盜深，中原回首涕成霖。
消愁萬斛無消處。

賴有幽花慰客心

其二

深院無人簾幕垂
玉英翠羽燦芳枝
世間顏色難相似
晴雪初殘未墮時

其三

冰玉風姿照坐寒
炎荒相遇且相寬
縞衣紵帶平生志
正念幽人尚素冠

郡城南曰瓊臺北曰語海
余易之為雲海登眺

有感二絕句

孤城南面敞瓊臺千里川原指顧開
試向綠雲深處望
海山浮動見蓬萊

其二

古來雲海浩茫茫北望悽然欲斷腸
不得中州近消息
六龍何處駐東皇

謁寇忠愍祠堂

鑿井得泉今尚美挂錢插竹後成林
精忠感動無情物

不解潛銷讒妬心

過北流縣八里遊勾漏觀

百里仙山氣象雄參差峯岫翠成叢雲駢鶴馭今何處
丹竈依然洞穴中

其二

葛翁求令為丹砂今我來從海上槎祇恐山靈嫌俗駕
未容歸客卧煙霞

其三

羽人相導把霓旌窈窕松林露氣清不用逢迎同貴客
暫來花院聽棋聲

藥圃

病翁餌藥欲扶衰自斲霜根種種移端為出山成小草
白雲深處養青芝

嚴陵灘下作

帝座高懸漢客星樵漁今亦想英聲危臺直下三千尺
誰謂先生只釣名

仙機巖

雲去仙機杼袖空報章何日已成功天孫織就煙霞錦
吹落溪山夕照中

魏王峰

危峰孤峭與天通猶有當時羽化蹤仙馭自隨鸞鶴遠
玉樓金鎖白雲封

春詞

余謫沙陽寓居興國佛祠寢西小軒春至梨花

盛開玉雪可憐修篁嘉木幽禽百轉每晨坐
讀書午睡初醒把酒寓目慨然感懷因成春
詞以紀景物可以興可以怨庶幾乎詩人之旨
覽者無誚焉

朝來急雨作輕寒只恐梨花落點殘喚起小童窓外看
玉妃何事淚闌干

夜坐

平生最喜夜看書人靜心閒樂有餘識盡古今興廢事

何如一枕夢華胥

七夕

銀河清淺界煙霄
欲渡何須烏鵲橋
今我去家千里遠
却憐牛女會今宵

秋意

蕭蕭南浦白雲秋
楓葉蘆花相對愁
何必更窮千里目
亂山凝碧滿溪樓

童子驛見梅花

天滑雲腴凝不流，歲寒迂騎過南州。
黃昏孤館沈吟處，賴有江梅慰客愁。

清修寺在益陽數十里間，惠遠之弟居之，世謂之小廬山。

盤紆石磴白雲間，風落巖花滿路斑。
峯嶺橫斜自重掩，箇中真是小廬山。

邵陽道中雲巖寺

山空小寺依嵌竇，日暖幽禽囀好聲。
萬箇琅玕一茅屋，

何當此處寄浮生

山月驛聞子規次韻

春枕夢回孤館悄，世故榮心愁不了。
山深夜聞子規啼，殘月滿牕天未曉。

道陽朔山水尤奇絕，舊傳為天下第一非虛語。
也賦二絕句

溪山此地藹佳名，雨洗煙嵐分外青。
却恨征鞍太匆遽，無因一上萬雲亭。

其二

賦詩曾送謫仙人
垂老翻遊到海濱
夢幻去來何自了
空將病眼看嶙峋

附岳飛詩

送紫巖張先生北伐

號令風霆迅天聲
動北陬長驅渡河洛
直擣向燕幽
痛飲黃龍府
先登木葉樓
歸來報明主
恢復舊神州

寄浮圖慧海

湓浦廬山幾度秋長江萬折向東流男兒立志扶王室
聖主專師滅敵酋功業要刊燕石上歸休終伴赤松遊
丁寧寄語東林老蓮社從今著再修


池州翠微亭

經年塵土滿征衣特為尋芳上翠微好水好山看不足
馬蹄催趁月明歸

題新淦蕭寺壁

雄氣堂堂貫斗牛誓將直節報君讐但祈聖主還車駕

不問登壇萬戶侯



石倉歷代詩選卷一百七十一

欽定四庫全書

集部

石倉歷代詩選卷一百七十二至
四

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣孫球

謄錄監生臣劉遼

欽定四庫全書

石倉歷代詩選卷一百七十二

明 曹學佺 編

宋詩四十九

歐陽澈

醉中食鱸歌

君不見秋風朱發鱸正肥
張翰思歸心欲飛
又不見田
丈有客歌彈鋏
為歎無魚聲激烈
水晶細鱸落金盤
須

信江南味中絕山谷曾名醒酒水一筋未嘗延俗客助
盤橙橘薦甘酸入口瓊瑤碎牙頰扶起嵇康頽玉山滌
破樂天醉吟魄烹龍炮鳳未云珍策勲終是愧霜鱗江
湖散人興不淺為羨此品常垂綸有時舉竿獲錦鯉玉
屑花中拚爛醉笑他大嚼市廛流浪說屠門能快意靈
運池中蓄頗多揚髻鼓鬣戲清波知我平生嗜此癖霜
刀細縷紅玉槎典衣沽酒試轟飲頡紋入面春風和平
生逸氣射牛斗功名未必常蹉跎醉來擊劍歌白雪閒

愁萬斛俱消磨俗態翻雲仍覆雨世情炙手復張羅
丈夫富貴當自致耻傍權門効女蘿雄圖自許羞俯仰請
看毫端食鱸歌

七夕後一日寄陳巨濟

并引

去年七夕待試臨川二三友從遊于巽溪閣江山氣
象如在水壺玉鑑中汝川勝槩一目而盡酒酣興發
舒牋點翰爭賦新詩以攄逸氣今年七夕憂患沮
喪胃臆結約強追談笑會諸友飲于遽軒眼對景

物緬懷舊事愴然驚怛黎明欲遣人問巨濟動靜
戲作古詩以供捧腹

高樓昨夜西風轉耿耿銀河雲葉卷擎空皎月弄嬋娟
領畧溪山堪指點秋光次第磨青銅一味清涼襲庭院
遙知天外鵲橋成牛渚黃姑會佳燕凭高翻憶鳳樓人
殷懃乞巧陳芳莫可堪目斷心旌搖砌成幽恨無人展
促樽欣得莫逆交脉脉閒愁憑理遣清狂舉白話平生
午夜香然殘寶篆淒涼此際憶年時爛熳瓊樓興不淺

重遊寥陽洞有感

尋真曾到寥陽殿小立廊腰花影轉飛瓊仙子下瑤臺
綽約雲鬟眼波剪水沈烟斷一簾秋醉睡海棠紅玉軟
武陵歸去探年華揚州夢覺江波遠重來風物恰依然
愛日融融素烟卷洞門寂歷鎖長春異水槎枒挿天半
霞衣冉冉媚東風綠鎖窗前重識面酒酣春筍理琵琶
曲終依約含幽怨人間名利幾時休馬蹄不駐空留戀
桃花流水古猶今回首碧雲人不見

和答德秀長句

摩雲標格儒林秀
濯濯美如春月柳
毫顛文陣轟雷槌
字勢龍蛇翻天矯
才名籍甚燭景星
卓然可獨尊南斗
締交雲路許攀鱗
談我諄諄不離口
層樓長記聳詩肩
吟苦任渠嘲太瘦
暗中輕擲道途人
相視誰論報瓊玖
強搜斐句答慙慙
當恕人才有能否

古詩寄游良臣兼簡陳國鎮

蘼蘓興淺知無策
謝絕歸來事清白
亂絲心緒尚紛如

時對風簷獨捫虱會雖稽古補前愆赤水遺珠不難索
仰公學問日芳新磨礱幸偶謫仙人遙知議論到佳處
眉間喜氣常津津我漸蹤跡浪萍梗欲親渠几嗟因循
飛奴寥落絕問福渴心依約生埃塵以膠投漆貴耐久
回光借燭期知貧情均骨肉非有素白玉琢成心始固
莫學紛紛輕薄兒世情翻覆成雲雨登雲依舊高嵯峨
指掌江南勝槩多佳眠風物未入夢疑泛靈槎遊絳河
竭來乘興須一往飛觴爛醉橫秋波膺門况有金閨彦

筆驅麗景森吟哦悠悠此志遂何日款段相期踏雪過

夢仙謠

并引

良臣拉僕醉于臨川吳溪閣江山勝槩一日殆盡
滿飲巨觴惟恐告竭酒酣興發猖狂不知所如往
爛遊花柳適有奇遇灑然非塵土之境醒而思之
恍如夢覺噫浮生荏苒特一夢耳而于夢之中適
有好夢焉豈容于默默作夢仙謠以紀其盛事云知
其夢者試揮鳳藻以繼韻否

寥陽洞口風烟好枯木槎牙挿雲島重重金鎖遶嬋娟
滿地落花常不掃蕭郎聞說已乘鸞空餘九轉燒丹竈
烟霞截斷絕非塵凡夫蹤跡無由到高陽有客携佳侶
訪異尋幽豁襟抱瓊樓飲散恣歡遊誤入蓬壺如夢覺
雲闕初叩閒無人松梢鶴唳如驚報須臾嚦戶迎者誰
吳宮女兒面凝脂指點蘭堂篆烟裊珠箔玲瓏窄地垂
高擎翠袖輕輕捲半露妖嬈素蓮臉嫣然一笑啟檀唇
喚我躋堂語聲軟相隨環坐一軒秋旋列杯盤供雅宴

倚風仙藥似有情競吐芳苞噴香遠朝雲一段下陽臺
綽約標容塵世鮮黛眉輕拂遠山青明眸斜盼秋波剪
蘭柔柳弱不禁風睡起芙蓉香體顫櫻桃緩啟歌貫珠
夕陽花外流鶯轉曲終低語愈含情自訴芳心猶未展
苞藏惟恐泄真香尋常嬌怯羞鶯燕為憐坐客俱多才
拚羞試許求相見安然若有惜花情願丐錦章鐫琬琰
溫柔淑惠已無雙更聽斯言真絕艷放懷舉白不暫停
酷嫌鸚鵡杯中淺醉玉頰山卧綺窗秋水一床凝角簾

悠颺好夢入巫峯洩洩溶溶興正濃遽然驚覺一何有
點綴餘霞散眼封依約餘香雖滿袂行雲縹緲已無蹤
壺中天地古來有默想風物遙應同我聞劉阮曾迷路
武陵邂逅如花女靈丹咀嚼頓輕身脫洗紅塵已仙去
又聞仙去有蕭防曾耦雙成飲玉漿一朝誤入華陽洞
于飛終許學鸞凰仙凡異境無憑據每笑前聞但虛語
豈意親逢事偶符始信人間有奇遇歸來燈火欲黃昏
隱几無聊暗追慕濡毫試作夢仙謠端欲夢魂重默悟

寄周居安

周郎辭氣帶烟霞凜凜秋霜嚼齒牙塵尾動思談吐屑
筆頭遙想夢生花三年幸獲從遊款一別那知歲月賒
遠欲飛奴傳翰墨顏筋柳骨儼秋蛇

秋試下即事有感寄國鎮

籬菊金英噴異香杜門岑絕獨持觴風掀脫葉橫斜舞
雲襯平林淺淡黃塞管有情增哽噎野花無緒伴淒涼
不禁景物撩秋眼剩與新篇付錦囊

戲促朝宗酒約

雨收雲海湧金盆
簾捲香絲破篆紋
雙陸無心酬白壁
十千有約醉紅裙
哦詩誤許聯師服
載酒真當過子雲
待遣秋娘呈妙舞
春山已把水沈薰

約吳公美斐季驂同赴會次前韻

伊誰汲井旋埋盆
喜見荷錢點浪紋
小立不妨人解佩
閒眠應有客書裙
未饒靈運吟春草
端憶長庚醉暮雲
顧我從容尚無躁
韓公何惜為三薰

春日書事

寂寂園林照日遲
花梢經雨漫胭脂
輕烟薄靄籠深塢
細草援苴蘸小池
暖力著人添醉聖
韶華入眼逼詩脾
賞心不惜千金價
冷笑閭閻數米炊

春霽

繡出園林霽色新
長郊芳草綠無垠
日籠瑞氣輕浮幌
風掠花芬暗襲人
蝶慕竊香爭趁暖
鶯思求友競啼春
試將何物澆詩膽
活火調湯滅玉塵

臨溪弱柳

柳弄嬌黃暖律催臨溪約畧笑殘梅鴨頭春水回環綠
龜甲屏山掩映開媚日依依籠霧閣搖風裊裊拂烟梳
柔絲恨不同攀折獨立江皋首重回

原上晚步聞笛有感

一笛誰橫透晚空傷懷真作鳥窺籠解龜換酒無知己
拾穗行歌悅屢豐淅雨秋山遮眼碧舞風霜葉點溪紅
老農拄杖來相問藉草高談夕照中

遣興示子賢

安貧萬事抵隨緣
羞澀囊空乏一錢
濁酒難賒應有恨
焦琴屢典已無絃
飯盂抄雪惟求飽
茗盃翻濤喜自煎
錦里先生有詩卷
破愁時誦兩三篇

傅巖居士挽詞

夢寐江湖僅十年
桑榆投老遁林泉
知人襟抱藏英鑒
奇我風標喚謫仙
妙論粲花今已矣
遺編戛玉尚依然
桐焦里巷知音少
幾對雲齊欲斷絃

龍涉傳巖有感簡朝宗

招提清曠竭來遊，潑墨風光眼界幽。
黃絹碑亡思子禮，碧雲詩好憶湯休。
風簷目送書空雁，烟塢愁聞喚雨鳩。
銷爍睡魔澆茗盃，桐窓拾得一枝秋。

陳欽若時寓盤龍作詩寄之因紀吟咏之美

凜凜冰霜嚼齒牙，沈沈清夜詠簷花。
摩雲氣逸干星斗，落紙詞妍帶綺霞。
醉掃麝煤奔渴驥，困紆象管引秋蛇。
擬尋紅樹賡詩社，却日揮戈不許斜。

讀傅巖居士舊詩軸有感

黃鵠凌雲不可尋
遺音流落感人心
朱顏綠髮留難駐
明月清風古到今
韞櫝有時驚下璞
絃無地置牙琴
傳巖蕭瑟傷心處
一局文楸鎖竹林

朝宗見和復自韻謝之

拾得佳篇李賀門
鸞牋重錄教諸孫
清于月夕滿湘水
淡似新秋太華原
發藥例雖霑賸馥
鉤深應寡與玄文
何時紅樹尋詩社
琢句令傾瀦灑樽

歸途遣興借朝宗韻簡敦仁

緩着歸鞭水石鄉
息鞍箕踞小橋傍
烟滋竹葉雙叉叢
玉秋着蘆花一岍
霜潑眼溪山增爽
氣襲人蘭蕙破幽
香擬提吟筆扛洪
鼎反笑蚍蜉不自
量

自鷺橋復用前韻

旗亭解轡詠江鄉
屬玉雙飛綠澗傍
水墨園林初過雨
青黃橙橘未經霜
鼎烹雲液澆腸爽
甕撥春醕破鼻香
回首謾驚烟水遠
向來清味怯思量

和題道筠軒有作

欲引秋聲竹旋移吟烟時一啟柴扉了無俗狀到公眼
每有輕風襲客衣地僻不知炎暑老身閒潛覺道心微
茫茫塵事俱減殺羞偶間較是非

和世弼蓼花

粧點千叢蘸碧流寧甘淡泞對清秋白蘋許共搖風細
黃菊欣同占景幽羞泄異香招舞蝶獨施繁艷伴漁舟
情騰醉眼牽情處贏得淒涼一段愁

謝人惠紫竹杖

王猷珍重惠龍孫策險扶危價莫論
爛醉懸錢過酒肆
狂吟步月打僧門
虛心尚有凌雲操
勁節元無染淚痕
寄語香山居士道
朱藤從此未為尊

和前韻紀登高醉中景示世弼諸友

芳晨秋興浩無涯
結客凭高酒旋賒
送目喜觀雲縹緲
狂歌誰顧帽欹斜
笑他子美看茱實
要學樊川插菊花
競說今年幸逢閏
再期攜手躡烟霞

和子賢對景有感次九日韻

醉撥春雲一甕香
潛欣積雨破秋陽
燈龕宜入詩書府
錢杖慵吟水石鄉
忘慮不斑潘岳鬢
養恬難斷廣平腸
賞音誰謂無蕭穎
時綴雄文弔戰場

世弼原上晚望和韻見寄因復之

綠消暮靄滿空秋
念遠凭高隴上遊
一片孤雲生遠岫
數聲哀雁落寒流
風前無緒愁聞笛
天際何人誤識舟
步月可尋巖下叟
試將圓玉鎖神頭

其二

鳩杖吟行笑撥雲爭疑賈島是前身名高鄭谷耕烟叟
樂過嚴灘釣月人俯聽鳴蛩爭唧唧潛窺宿鳥各親親
田家有秫俱簞酒乘興何妨徧訪隣

州學貴中庭上作

漠漠陰凝水墨天雨絲成陣拂窗前千層疊巘籠輕靄
一帶澄江鎖淡烟歸思似雲空散亂名蹤如葉尚留連
當時錯笑悲風賦今日閒愁頓默然

秋日居山

振衣拂曉啓松扃月淡風輕酒頓醒
密竹含烟爭滴翠幽蘭浥露遠聞馨
清憐高潔蟬嘶柳閒羨優遊鹿食苹
試枕碧流端洗耳白雲深處誦黃庭

其二

一抹輕烟鎖遠山眼封瀟灑脫塵寰
投林宿鳥相呼喚出草飛螢自往還
吟擬停杯邀月飲醉蘄支枕伴雲閒
因風拾得新詩句獨倚高梧笑解顏

寄良臣

耳冷清談脩半年，渴心如憶嶺頭泉。
自慙託迹多南北，無復從遊學聖賢。
莫謂卑飛同斥鷃，已全高潔慕鳴蟬。
荒涼不厭幽居趣，假道何妨試着鞭。

督德秀還酒會

綠鎖窓前聚首時，戲彈圓玉偶輸機。
侑觴既欲携紅袖，送酒何妨遣白衣。
酩酊預期歸倒載，從容端約話玄微。
揮戈直使頽陽却不計，西風隱半歸。

臨川戲留友人

山童澤涸欲金流
小雨廉纖陡變秋
河朔飲徒方快意
鱸魚歸興不如休
歌姝況有飛瓊侶
結客當為擲果遊
一曲陽關腸斷盡
未應聞此不遲留

子賢和韻見酬次答之

詩名浪得在盧前
器識慙非叔度賢
捉月笑他吟采石
凌雲端欲賦甘泉
發硎喜淬衝牛劍
啓齒羞談使鬼錢
平世未應徒爾爾
行藏終與古人肩

和子賢夏日晚望

溪山潑墨水雲秋似綺餘霞次第收
燦燦拒霜鋪蓼岬
雙雙屬玉舞蘋洲
杳無錦字來憑雁
擬滅機心試狎鷗
望裏碧雲還又合
數峯江上忍擡眸

朝宗以詩贈行和酬二篇一以留別一以謝詩
漱醪常共醉琳琅魚目慙遊漲海傍
琴聽雅音彈碧玉
鼎分靈劑煉玄霜
纏腸錦繡篇章麗
入室芝蘭燕寢香
欲別未應徒爾爾
鵬程萬里事難量

鍛鍊新詩摘錦囊
筆驅秀麗汝川傍
氣橫阿劍疑千斗
韻入豐鍾必待霜
道勁狂揮毛穎疾
淋漓醉掃麝煤香
珠璣喜就鮫人乞
收拾端期百斛量

輕風破暖

單衣初試輕寒退
嫋嫋軟風襟袖快
層樓高捲酒旗斜
綺陌亂飄花錦碎
多情故把惱人腸
楊柳陰中弄暗香
解貂不惜換斗酒
爛醉春光能幾場

杜宇啼紅

蜜脾香滿青春暮寂寂空山聞杜宇啼紅泣綠怨東風
錦城舊恨懷千古可堪腸斷對樽前雄圖未遂愁無邊
頗有提壺勸我飲起舞從教落醉船

喜雨

北窓支枕夢初回風掠餘香特地來顛倒衣裳望池上
荷花無語為誰開

其二

楊柳藏鴉菡萏香水亭風榭襲羅裳秋光正入詩人眼

剩得餘篇付錦囊

歸自臨川途中感物遇事得八絕句寄秀美

信馬沿堤懶着鞭不堪回首望臨川
滿懷離恨如春夢愁聽林梢斷續蟬

其二

啾唧蛩吟旅况淒那堪孤枕酒醒時
夢魂栩栩知何處依約幽軒話別離

其三

窓含月影夢初回一枕淒涼眼懶開幽恨閒愁本無種
根苗不識是誰栽

有寄

情騰醉眼漾嬌波心印潛通一捻多密寄斷腸雙麗曲
過雲須倩雪兒歌

和子賢途中

暫停雙漿傍蘋洲磯上漁翁雪滿頭釣破烟波深得趣
生來不識世間愁

其二

索寞襟懷不奈秋雕鐫佳句且忘憂行行恰過橋南路
一片蘆花映碧流

其三

桐圭柳帶正凋疎匹馬區區倦遠途腸斷不堪回首處
寒雲影裏雁聲孤

和答國鎮

十圍便腹卧邊先笑傲羲皇訪昔賢詔下好須同舊侶

槐花香裏走連錢

寄游良臣

壯浪年來筆有神
詩如開府頓清新
暗中慎莫投珠璧
道路無非按劍人

其二

文會何時聚
德星紫芝眉
宇照人清
錦韉並控尋春馬
持酒憑花為解醒

石倉歷代詩選卷一百七十二

欽定四庫全書

石倉歷代詩選卷一百七十三

明 曹學佺 編

宋詩五十

汪藻

桃源行

祖龍門外神傳壁方士猶言仙可得東行欲與羨門親
咫尺蓬萊滄海隔那知平地面有青春只屬尋常避世人

關中日月空萬古花下山川長一身中原別後無消息
聞說邊塵因感昔誰教晉鼎判東西却愧秦城限南北
人間萬事愈可憐此地當時亦偶然何事區區漢天子
種挑辛苦望長年

過吳明叟新居

誰開大屋沈沈者門外垂楊拂車馬主人四十持節歸
高卧綠陰啼鳥下冥冥一徑傍花入忽有清池照深夏
魚吹落日知鏡淨荷受微風看珠瀉夫君少多湖海氣

欲騁驂騑無地跨故將能事驚世人坐向雲端差萬瓦
稍培幽桂出窓前時放青山來竹罇人言此興極不淺
天遣公忙那肯赦要須便作輞川圖他日思歸聊對畫

同張昌時宿高明寺

幽卧不知覺窓懸寒日初矧伊夜來雨谿聲到吾廬故
人挽我出忽枉天際書躋險敢自休青山轉籃輿相逢
竹間寺共擷園中蔬殘僧誰在亡奄忽十載餘茗果話
疇昔新晴報鐘魚東雷亦已鳴百草茗頴舒柰何與之

子齒髮日夜踈眷此不能發牽衣更踟躕明朝各回首
世事將焉如

次郵軍

小雨靜林麓鵲鳩相應鳴移舟漾清淺薄晚荷氣歸
鳥盡雙去潛魚時一驚菰蒲若無人渺渺炊烟橫艇子
檝迎我攜魚薦南烹月出殊未高踈林隱微明依沒會
有處斗掛天邊城

阻風雨辟邪渡寄王仲成

渡頭急雨鳴森木木杪顛風飛大屋沒腰寒水稻生芽
蒲眼青泥車折軸山行值雨舟值風窮愁日日煩天公
不如歸卧澗壑底世事不埽春烟空別君兩年重此別
喜君胸次渾水雪擬將身作賈胡留無奈事如空鳥滅
挽我不回君怒嗔交情把握轉清新相隨百里還相見
只有西山似故人

避地函亭野步

今日幸無雨天空出遙岑行行不知疲遂至春江潄汲

路轉籬落人家在桑陰平疇漲清波隴麥如人深溝畎
戲鳧鶩新蒲映浮沈我生本樵漁對此諧初心風物豈
不好悲來自難任邊塵暗中原四海如驚禽黃屋狩萬
里兩宮隔辰參龍移螻螳窺月晦蟾蜍侵宇宙有傾覆
茲游豈嶇嶇銷憂賴濁醪太息誰能斟

庚午歲屏居零陵七月二十日以門揜候虫秋

為韻賦五首

幽人獨夜時潮落西川根渡口櫓聲急一江烟雨昏城

頭短長更不寐聽譙門趺坐數千息焚香待朝暾

右一

暑退潦亦收瀟湘淨如染時觀自跳魚衝破青琬琰纖
纖初弦月不受薄雲掩近村應漸寒已有鴉數點

右二

人生幾聰明日夜隙駒驟纔經花信風又過麥秋候吾
非金石堅與世相邂逅胡為聞鐘鳴更歷路傍埃

右三

家山在何許渺渺彭蠡東人來數月程衣敝補道中昨
宵青燈花似墜釵頭虫兒女饑沈繇歲晚書未通

右四

人言間濶者一日如三秋孤臣昔放逐七見寒暑周早
滲高門地姓名記前旒如何天雞星不照湘南州

右五

次韻向君愛感秋二首

且欲相隨首荷盤不須多問沐猴冠菊花有意浮杯酒

桐葉無聲下井欄
千里江山漁笛晚
十年燈火客羶寒
男兒幾許功名事
華髮催人不少寬

向侯挂笏意千里
肯為俗彈頭上冠
何時盛之青瑣闥
妙語付以烏絲欄
日邊人去鴈行斷
江上秋高楓葉寒
向來叔度儻公是
一見使我窮愁寬

晚發吳城山

風埽陽侯雪陣平
雨催摩詰畫圖成
氣吞浦溆重林盡
秋著江湖去鳥明
厚祿故人無一字
長年三老伴餘生

會須滿意開懷抱到眼廬山不世情

過臨平

一別九宵路風烟長滿衣已成身老大無復世輕肥天
濶鳥雙下山寒人獨歸曉來何似雨春水半巖扉

其二

睡起涼生岼鉤簾坐小窗麥風能起柁梅雨不鳴江往
事心長折歸途影自雙依然蒲柳地不待早秋降

書寧州驛壁

過眼空花一餉休生狂猶得佐名州雖遭瀧吏嗤韓子
却喜溪神識柳侯盡日野田行穰稈有時雲嶠聽鉤輅
會將新濯滄浪足踏遍千巖萬壑秋

宿鄮侯鎮

當時踏月此長亭髮似河堤柳色青今日重泉堤樹老
一簪華髮戴寒星

微涼初破候蟲秋露草螢光已不流搔首與誰論往事
星河無語下城頭

龜山上方

度險逢幽處，憑誰寫壯懷。
連甍棲絕壁，孤塔表長淮。
地本吳楓接，山今禹績皆。
潮聲從殷寺，竹影自翻堦。
木杪朱欄出，城坳雪浪埋。
乾坤迷往渚，霧雨泄陰崖。
丹葉經寒瘦，蒼洲向晚佳。
魚龍宵聽唳，猿鳥晝窺齋。
月滿瓊珠實，霜清磬石諧。
僧盃收栢子，樵徑埽松釵。
左宦書無鴈，南烹菜有鮭。
風烟欺短髮，雲水信殘骸。
竟作何鄉老，虛慚素尚乖。
江湖今在眼，歸合辦青鞋。

醉別李高侍郎

疇昔追隨翰墨場功名今日愧劉郎
英姿合上凌烟閣巧譖曾遭偃月堂
雙槳又乘清夜去一樽聊發少年狂
歸來却共燈花語騎省看成滿鏡霜

漫興

晨起脩然曳杖行一簾疎雨作秋清
老來歲月能多少看得栽花結子成

燕子年年入戶飛向人無是亦無非
來春强健還相見

送汝將雛幾度歸

北窻

睡起無一事怡然盼庭柯綠陰微缺處最得涼颼多

已酉亂後寄常州使君侄

汾水遊仍遠瑤池宴未歸航遷新廟主矢及近臣衣胡
馬窺天塹邊烽斷日畿百年還海地回首復成非

古鏡行

我有辟邪鏡得之咸陽宮其陰為天池一母將九龍旁

書負圖字上蝕如旋蟲絨以駁鷄珍妙極倖之工請言
照遠近十里秋毫空豈不鑒脂澤所貴肝膽通問誰為
此器太古非人功客聞重歎息意欲窺靈蹤高臺不辭
倚恐客難稱容繩窮匣半啟四室來悲風日車常晝留
羞澁如頑銅森然髮上指凜若臨霜鋒我還撫客手此
豈世寶同揮淚兩無言掩鏡鞞囊中

蔡天任韻

修廊過午夕陰合蝴蝶滿庭春草長呼兒更捲簾數尺

要放晚晴升屋梁

右浮溪文粹若干篇宋顯謨閣學士汪彥章所作
彥章婺源人卜居陽羨仍以故居浮溪為號平生
著述甚富尤長于四六行世有浮溪集六十卷此
特選其膾炙人口者耳南渡中興軍國多難彥章
初拜掖垣掌內制大典冊多出其手當時德音所
被讀者悽憤興感以北陸敬輿後生言者指為京
散黨一斥不復起惜哉續言行錄列之名臣良有

見云

石倉歷代詩選卷一百七十三